

1 PITA

Pita eter kiyi bas rasem siglou.

Kiyi late tuma.

Gwote siglou Pita ere bas rasen akeite provins temenem Kristen emne newopitim. Romri gavman tame eme ete Kristen emne yaper nenbetem, Kristen eme nogwape mus eisau meten pap yaper tebetem, eke Pita ere emne gwote siglou bas rasen emne mureken tuma emne bas rasem Gwotepte ete nowsel nema kantri Turki wobe.

Ere emne etep bas rasem. Kem Jisas erne som abobetete. Jisas eter ere mus eisau meten taskwuren sam, ere wou sene peten wayen yim. Ere sene yate, ere nemne sene pette. God ere kemri kenawaike abobekap ere seilabe. Kem erne mesginte, o erne beke kip mesgin, ere etep late, eke tatame eme kemne yaper nenbe. Kem erne beke kip mesgin, ere kemne tokwo yenbosubuwai Hevenke newote nenbe. Eke kem God eri wule noub tobote. Pita ere etep bas rasem.

Pol ere gwote siglouke bas rasem tuma gwo.

Sapta 1:1–2:10. Nema God eteri tatame tem, eke nema wule yenbo nenen yin wos yenbo yuri pette.

Sapta 2:11–3:22. Nema tatame etemri borke yibetete, nema wule yenbo tobote.

Sapta 4–5. Kristen tatame emne seilabe wos eisauke ten eme mus metem.

1 ¹An Pita, Jisas Krais eteri aposel yaku kerebe tame. Kem God eteri tatame, an kemne gwo siglou bas rasbe. Kem keremri maime kom mesginin yikwute yakwutem. Kem provins nogwape, Pontus, Galesia, Kapadosia, Esia, Bitinia etek yin kem ek ya tamekap etek tetan. ²Kiyisapewai Apei God ere kemne abon kenem, ere kemne eteri tatame tete wom. Jisas Krais eteri nep kemne eyaren kem yenbo tete, kem eteri tuma noub meten tobote, eke God Eteri Wou ere kemne eyarem, kem tatame yenbowai ek tem. God ere kemne kobo kenake lan kemne som noub nente. Kem pap yenbo meten temente. An etep abobe.

Nema noub som temente komke yite kouten.

³Nemri Aneyen Jisas Krais eteri Apei, eteri Keryen God erne nema pir wobe. Ere nemne kobo eisau labe, ere Jisas Krais erne wou sene newom, eke nema porere yenbo peten eteri tatame tem. Etep ten, God ere nemne panen yite abobe, eke nema eteke kouten. ⁴God ere eri tatame emne nentekap, emne newotekap, ere nemne etep kir nente nenbe. Ete wos e yaper beke kip ten, kupa ten, ete wos e seba beke kip te. Berai. Ete wos God ere Hevenke lakerebe, ere kemne newote nenbe. ⁵Ye. Kem God erne kenawaike abobe, eke God eteri mure eisauke ere kemne noubwai lakeren yin kemne sene pette nenbe. Krais ere sene yate nenbe yabel, ere kom genik kemne sene peten kem yenbo tete.

⁶Kem ete tuma abon metekwasen letewo oksubu tete. Gwopte yabel God ere wote, be wos be wos yaper e kemne kerake ten kem pap yaper mette. ⁷Beke wos yaper kemne tebe? Tame eme gol kerke lisin seilabekap, God ere kemri kenawaike abobe wule etepke seilate. Kem erne kenawaike abobe, o kem erne bepou me abobe, ere eteke late. Gol e tokwo eisauke tukbe wos, ete wos som beke temen. Kerem seten kenawaike abobe wule e gol erne teitkwunten. Be wos yaper kemne tete, kem God erne som kenawaike abote, kem kuyese taskwurte. Etep tete, Jisas Krais ere genik tete yabel kem sig yenboken sig eisauken pette nenbe. ⁸Kem Jisas erne mak laten, kem erne kenake abobe. Gwopte kir, kem erne mak laten. Kem erne kenawaike abon metekwasen letewo oksubu tebe. Etep tetankap, kem kuyese beke wusou. ⁹Kemri erne kenawaike abobekap, God ere kemne sene pette nenbe, kem yenbowai som temente nenbe.

¹⁰God ere tatame emne pap yewon sene pette tuma, God eteri kiyi temenem tuma wusoubetem tame eme e yuri keremne tete woskap wusoubetem. Ete tuma somo eme noub beke met. Eme somo som sopen wometbetem. ¹¹Krais Eteri Wou ere etemken temenem, etepkap Krais eteri mus metemkap, eter apeilake eisau temenemkap, eme etep noub wusoubetem. Wusoubetem, eme abon etep wometbetem. Ete wos makapke tete? Beke God ere etep nente wobe? Eme etep wometem. ¹²God ere emne etep wom. Kerem wobe tuma e keremne maime kobo beke kip la. Berai. E yurik tete tatame etemne kobo late nenbe tuma. Etep wom. E yurik tete wom tatame, e kerem. Etem wusoubetem tuma, God eteri tuma yenbo wusoube tame eme kemne wusoubetem. God ere Eteri Wou erne won yam, ere Heven mesginen yan eteri murek eme kemne ete tuma yenbo wusoubetem. Etem kemne wusoubetem tuma, God eteri komri tame eme noub mette abobe.

God ere nemne tatame yenbo tete eke wopetem.

¹³God ere etep nenem, e kem porere noub abote. Kem maime mane abote. Jisas Krais eter genik yate yabel God ere kemne pap yewon noub

nentekap, kem etepwou kenawaike abote. ¹⁴Kem tuma wan wurik metbe tatamekap tete. Kiyi kem worisubuk temenem, kem wule yaper nente abobetem. Kem etepkap sene mane tete. ¹⁵Kemne wopetem tame ere yenbosubuai, kerem kir, kem tatame yenbosubuai tete, kem wule yenbosubuwou nenbetete. ¹⁶God eter bas rasten tuma etep wobe. Aren, an yenbosubuai. E kerem kir, kem yenbosubuai tete. Etepke bas rasten.

God ere nemne tokwo eisauke tuken petem.

¹⁷Kem God erken namdebe, kem erne Apei wobe. Ete Apei ere akei tatame etemri nenbekapwou lan noub sin labe. Eke kem erne aken eri tuma noub meten nenbetete. Kem keremri maime komke beke te, kem ek ya tamekap tetan. ¹⁸Yeiwarege etem kemne newom wule e oksubu yim, eke God ere kemne sene tuken petem. Yaper tebe tokwo, golken silvaken, etepkap tokwok ere kemne beke tuk. Berai. ¹⁹God ere kemne tokwo eisauke tukem. Ere kemne Krais eteri nepke tukem. Juda etem God erne kwar pebe wule eme sipsip yen yenbowai, wus me lak bakbe, eke peten God erne kwar pebe. Krais ere ete sipsip yenkap, ere yenbowai. ²⁰God ere nelken selken mak seikmenem, ere Krais erne won ere keremne kobo late wom. Wom, gwopte nowsel omote mekin mekinemke, Krais ere genik tem. ²¹Eterke kem God erne kenawaike abobe. Ere sam, God eter ere erne wou sene newon ere sele meike sene wayen yim, God ere erne sig newom. Etepkap, kem God erne kenawaike etep abobe. Ere nemne sene peten, noub tobote womkap, ere etep nente nenbe. E etepwou eterne kenawaike abobe.

Nema Kristen geisimase emne pap yewobetete.

²²Kem wule seken noub meten tobobe, eke kemri porere yenbo tem. Etep tem, kem Kristen geisimase emne kuyese kobo lan noub nenbetete. Kem awoawo noub pap yewobetete. Kem kobo bepou mane late. Kem pap yenbo ten emne pap yewon noub nenbetete. ²³God eteri som temente mureken tumak kem tatame ager tem, kem eteri yen tem. Keremri ar ere beke sa. Ere som temente nenbe. ²⁴God eteri tuma etep wobe.

More tatame eme menamane walkukap. Emri mure e me walku eme sok ten yeirbekap, tatame eme sabe wule mureken porereken akei kir sabe.

²⁵Tatame eme sate nenbe, Keryen God eteri tumawou ere som temente nenbe.

Etep wobe. Ete tuma eme kemne wusoube tuma yenbo.

Aneyen ere mureken ake nawo kwatkap.

2 ¹Etepkap, kem wule yapersaper mane nente. Kem tuma mane yikwokwote. Kem tatame emri wos, emri nenbekap mane malte.

Kem kerebe tuma mane wote. Etekap wule kem mesginte. ²Geibele yen eme muk ate kerabekap, kem God eteri wule yenbowou pette eteke kerate. Eke kem peten noub sebetete, etekap kem Kristen sespe tetek, God ere kemne sene pette. ³Aneyen eter pap yewobe wule kem seilam. Ete wule e yenbowai.

⁴Kem erne mekinke temente. Eri mure eisau, ake nawo kwatkap. Tatame eme erne yaper won magel tayem. God eter ere erne kenem, erne sig yenbo tem. ⁵Kerem, kem mureken ake eteri teban, magel, taikwokap. God ere kemne peten eteri ake etek kerebe, Eteri Wou ere ete akek temente. Kem God eteri yaku kere tatame yenbo ten kem God eteri yaku keren erne sukye worate. Etep tete, God ere Jisas Krais eterke ere kemne metekwaste nenbe. ⁶God eteri tuma etep wobe.

Kem ek la. An nawo kwat yenbowai peten Saion komke ake kerebe.

Tatame eme erne kenawaike abote, eme pap yaper beke kip te.

Eme sebera beke kip ya.

⁷Kem kenawaike abobe tatame, kem etep wobe. Ete k wat ere Krais, ere tame yenbosubuwai. Kenawai beke abo tatame eme gwopkap.

Ake kerebe tame emri mo won magel tayem k wat, ete k wat ere nawo k wat tem.

⁸Sene God ere tuma etep wom.

Ete k watke tatame eme tewo etek tebetete nenbe.

Tatame emne tewo ete k watke tebete pitin warte nenbe.

Ye. God eter kiyi womkap, eme eteri tuma beke met, eke eme tewo etek tebete pitin warem.

Nema God eteri wakse.

⁹Kerem, kem God eter kenem tatame. Kem Keryen God eteri akek yaku kerebe tatame. Kem tamesip yenbosubuwaike tetan. Kem God eteri tatame. Kiyi kem kerneirik temenem. Sene God ere kemne wopetem, kem eteri yabel genikapke tetan. Etekap, eter nenbe wule yenbo kem tatame nogwape emne etep wusoubetete. ¹⁰Kiyi kem God eri tatame beke te, sene kem God eteri tatame tem. Kiyi kem God eteri pap yewobe wule beke met, gwopte God ere kemne pap yewobe.

Nema God eteri yaku kere tame tete.

¹¹Ari tamesip yenbo, gwote nowsel e keremri maime nowsel seken berai. Kem genek ya tamekap. Kem bepou me tetan. Heven e keremri maime kom seken. Eke, an kemne wobe. Kem nowselri wusomri wule yaper mane nente. E wule yaper ere keremri wou eterken naibe. ¹²Kem Kristen berai tatame emken temente, kem emne wule yenbowou nente. Eme kemri nenbe wule yenbo late, kap kau eme kemne tuma yaper won bepou me etep wote. Kem wule yaper nenbe. Ete tuma yikwokwon wote,

yuri God ere emne yan late yabelke eme kemri nenbe wule yenbo sene abon God erne pir won eri sig yenbo wote nenbe.

¹³Kem Aneyen Jisas eteri wakse, eke kem nowselri apeilake emri tuma noub meten etep nenbetete. Kem nowselri apeilake eisau eri tuma meten nenbetete. ¹⁴Eri won yam gavman yaku nenbe tame etemri tuma kir, kem noub meten tobobetete. Ete tame eme wule yaper nenbe tame emne yaper awosein nenbe, wule yenbo nenbe tame emne eme wule yenbo awosein nenbe. ¹⁵God ere gwopkap wule abobe. Kem wule yenbo som tobobetete, eke tumasubu wobe worisubu tame eme tuma rebe tete. ¹⁶Kem tege tamekap tete. Etepkap tete, kem wos yaper mane berasen nente. Kem God eteri yaku kere tatame temente. ¹⁷Kem nogwape tatame emne tuma yenbowou wobetete. Kem Kristen geismase emne pap yewon kobo labetete. Kem God erne me akbetete. Kem nowselri apeilake eisau erne tuma yenbowou wobetete.

Nema Krais eteri wule tobon mus meten taskwurte.

¹⁸Kem yaku kerebe tatame, kem keremri yaku lakerebe tame etemri kulke wurin temente, emne tuma yenbowou wobetete. Kemne wule yenbo nenen lakerebe tameken wule yaper nenen lakerebe tameken kem emne tuma yenbowou awosein wobetete. ¹⁹God ere etep tebe tatame emne metekwasbe. Eme God erne abon wule yaper beke nen, tame eme emne yaper bepou me nenbe. Etep tebe, eme taskwuren eme beke sumarku. Etep tebe tatame God ere emne metekwasbe. ²⁰Kem yaper nente, eme kemne yaper awosein nente, kem taskwurte wote, God ere kemne sig yenbo kuyese beke kip wo. Kem wule yaper beke kip nen, eme kemne yaper bepou me nenen kem taskwurte wote, etepkap God ere kemne metekwaste nenbe. ²¹Metye. Krais ere kemne kobo lan mus kenake metem. Eke kem eteri wakse tem. Eke eter nenbetemkap, kem etep kir nenbetete. God ere kemne etep nente wobe.

²²Krais ere wule yaper beke wuri nen. Ere tuma beke wuri yikwokwo. ²³Eme erne tuma wom, ere emne awosein beke wo. Eme erne yaper nenbetem, ere mus metbetem, ere emne yaper awosein beke wo. Ere kenawaike etep abobetem. God ere akei tatame emne noub seilate. E eteri wos. Ane yaper nenbe tame emne ere yaper sein nente o beke kip nen, e eteri wos. Ere etepke abobetem. ²⁴Metye. Tame eme erne mek kwanem, ere nerem nenbetem wule yaper akei peten sen ek sam. Nema wule yaper mesginen wule yenbowou nenbetete, eke ere nemne kobo lan sam. Ye. Eter mus eisau metem, eke nema tatame yenbo tem. ²⁵Kem sipsipkap temenem, kem kom mesginen boulke belen yimkap, sene kem sipsip lakerebe tame erne sene yan lamkap. Jisas ere Keremri Wou Noub Lakerebe Tame.

Taken tameken emne wobe tuma.

3 ¹Kem tame yiten ta kem tame etemri kulke temente. Kem emne tuma som mane wote. Etepkap God eri tuma beke met tame kau

eme kemri nenbe wule yenbo latek, eme God erne kir abote. ²Ye. God erne aken wule yenbo nenbe ta, tame kau eme kemne etep late, etepkap eme God erne kenawaike abote. ³Kem wusom yenbo labe kerap yenbotanbo mane kenake wolete. Kem tare take mane gusen peiken yate. Kem golke nenem kerap yenbo mane som wolete. ⁴Tatame eme kemne yenbo late, kem gwopke tete. Kem pap yenbo ten tuma elen me namdete. Ete wule e yaper beke te golke nenbe gabu yase yenbokap. Eke God ere ete wule metekwasbe. ⁵Kiyi temenem ta yenbosubu eme etepkap wule nenbetem, etepkap tatame eme emne yenbo labetem. Eme God erne kenawaike abon eme tame etemri kulke wurin temenem. ⁶Sera, Abraham eteri ta, te etepke abobetem. Te tame eri tuma noub meten tobon erne keryen wobetem. Kem etepkap wule yenbo tobon be wos be wos beke ak, kem Sera etetri yenkap tete.

⁷Etepkap, kem taken tame, kem keremri ta emne noub abon emne yenbo nenbetete. Ta eme mure eisau berai, etepkap kem emne yaku kobo lan emne tuma yenbo wote. God erne emne kobo kir lan keremken kir sene pette, eke kem emne etep nente. Kem emne wule yenbo beke nen, kemri God eterken namdete tuma ere beke kip met.

Nema tatame etemne wule yenbowou nenbetete.

⁸Tuma omote nenbe, an kemne etep wobe. Kem akei kem selpap wurisubuk temente. Kem awoawo kobo labetete. Kem geisimase emne noub nenbetete, emne pap yewobetete. Kem maimewou mane abote.

⁹Tatame eme kemne yaper wote, kem emne yaper awosein mane wote. Eme kemne yogwu wotoute, kem emne yogwu awosein mane wotoute. Eme kemne yaper nente wote, kem God erne womettek, ere emne yenbo nente. God erne kemne etep tete eke wopetem. Etepkap, ere kemne kuyese yenbo nente nenbe. ¹⁰God eteri tuma etep wobe.

Eike tatame eme noub temente abobe, eme yabel yenbo late abobe,
eme beke nenen ek late?

Eme tuma yaper mane wote.

Eme tuma mane yikwokwote.

¹¹Eme wule yaper magel tayen wule yenbo nenbetete.

¹²Wule yenbo nenbe tatame emne Keryen ere lakerebe.

Emri wobekap ere etep noub metbe.

Wule yaper nenbe tatame emne Keryen God ere ragi eyin, pap wayebe.

Etep wobe.

Nema wule yenbo nenen, nema mus mette, e tuma berai.

¹³Kem wule yenbo noub nente abobe, eike eme kemne yaper beke kip nen? ¹⁴Kem wule yenbo nente wote, sene kau tame eme kemne

yaper nente wote, kem pap yaper mane tete. Kem emne mane akte. God ere kemne noub nente, kem metekwaste. ¹⁵Kem keremri porerek etep abobetete. Krais ere areri Aneyen. An eteri kulke tetan. Etep abote, tatame eme kemne wolate. Beke kem Krais erne kenawaike abobe? Etep wolate, kem emne noub awosein wote. Kem kiyi noub abon emne noub awosein wote. ¹⁶Kem emne wule yenbok elen me awosein wobetete. Kem wule yenbowou nenbetete, etepkap kemri porere yenbo temente. Kem etep nente, eike tatame eme kemne tuma yaper wote, eme kemri wule yenbo lan sebera yate. Kem Krais eteri wakse, kem wule yenbowou nenbe, eme kemne tuma yaper bepou me wobe, eke eme sebera yate. ¹⁷Kem wule yenbo nenbetetek, God ere kir wote, eme kemne yaper nente wote, e yenbo. Etepkap kem sig yenbo pette. Kem wule yaper nente, eme kemne yaper awosein nente, kem sig yenbo beke kip pet. Berai. Kem sig yaper pette.

Krais ere san sene wayen yim, nemne sene petem.

¹⁸Krais eter kir ere mus metbetem. Eter ere keremri nenbetem wule yaperke sam. Tewo wurik ere akei nenbetem wule yaperke sam. Etep tem, ete omom. Ere sene beke kip sa. Ere tame yenbo, ere nemne tame yaper kobo lan sam. Etepkap, ere nemne God eterke panen yibe. Eteri wusom eme pen sam, sene God ere erne wou sene newom, ere som tetan. ¹⁹Eteri Wou ere gabu komke yin etek ten yamenem kiyi saiwom tatame emne tuma wusoubetem. ²⁰Ete gabu, Noa ere temenem yabel eme kelpe tatame temenem. Temenem, eme God eteri tuma naswoyin beke nen. God ere emne koulawoyim, eme selpap yenbo beke pet. Ete yabel Noa ere sip eisau wuri nenem, tatame ep yekwo let ep yekwo let bor mur kei (8-pela) etemwou eme sipke wurim, eme okke beke an sa. Etemwou eme kelpe tem. ²¹Eme ok mesginin kelpe temkap, e gwopte kem baptais ok wirube wulek tatame ager tebe. Baptais ok wirube wule e ok wibe wule berai. Baptais ok wirube wule e gwopkap. Jisas Krais ere san sele mei mesginin wayen yim, eke tatame eme God erne wolate, ere emne selpap yenbo newote. Etep ten emne baptais ok wirute. ²²Jisas ere Hevenke yawom, ere God eteri yamame yekwok siten. Etek siten, God eteri komri tame, keryen tame, mureken tame, akei eme Krais eteri kulke tetan. Eter ere nemne sene petbe.

Nema nowselri wule mesginte.

4 ¹Krais ere eteri wusomke mus eisau metbetem, eke ere eteri porerek abobetemkap, kem etep abon mureken tame. Mus metem tatame eme wule yaper sene beke nen. ²Etepkap kem gwo nowselke temente, kem nowselri porere sene mane nente. Kem God eteri porerewouke tobote. ³God erne beke abo tatame etem nenbekap, kiyi kem etep nenbetem.

Eme sir yibe, eme wule yaper pap wayebe, eme ok yaper an sisi pebe, eme lomduwo tesen wule yapersaper nente abobe, eme belebalebe, eme sukye yaper worabe. Kiyi kem etepke nenbetem, e yau. ⁴Sene kem etemken etepkap wule yapersaper beke nen, eke eme kemne abolawoibe, eme kemne nogwape tuma yaper wobe. ⁵Metye. Yuri eme God eteri bitimi tobok teten God ere etemri nenbetemkap wometen emne tuma namdete nenbe. Ye. God ere kelpe tetan tatameken kiyi saiwom tatameken emne sin late nenbe. ⁶Eteke saiwom tatame eme God eteri tuma yenbo kiyi metem. Etem tebetemkap God ere si lan emne tuma namdete nenbe. Wou sene petem tatame eme God eterken som temente.

God ere nemne epkap epkap mure newomkap, nema Kristen geisimase emne etepkap murek noub nente.

⁷Jisas ere sene yate yabel mekin mekinye. Eke kem porere yenbo ten noub abote. Etep tete, kem God erken tuma noub namdete. ⁸Eisau wos wuri kem kiyi nente. Kem awoawo noub abon kobo labetete. Noub abon kobo labe wule ere nogwape wule yaper emne teitkwunbe. ⁹Kemne yan lan tatame kem emne pap yewon awos newon an tukna emi newote. Kem pap yenbo ten etep nenbetete. ¹⁰God ere kemne wurare wurare epkap epkap mure newom. Kem ete mure noub peten awoawo kobo late. Kem etep nente, kem God eter pap yewobe wule noub lakeren yaku yenbo nente. ¹¹Tuma wusoube tame eme God eteri wobe tumawou wusoute. Kobo labe tame, eme God ere emne newobe murek yaku noub kerete. Etep tete, Jisas Krais eterke God ere sig yenbo pette. Ye. God ere kom panen som site nenbe. Eri sig eisau som temente. Nema etep wobe. E seken.

Nema Krais eterkap mus meten taskwurem, nema metekwaste.

¹²Ari tamesip yenbo, be wos kemne seilan kem mus eisau mette, kem mane wouken akte. E be wos berai. Kem mane ep abo ep abote. ¹³Berai. Kem metekwaste. Kem Krais eteri metbetem muskap mette, kem Krais eteri tamesip tete. Yuri Krais ere sig eisau tete, kerem kir, kem metekwaswaite. ¹⁴Kem Krais eteri wakse tebe, tatame eme kemne tuma workwoyeken reste, kem metekwaste. Nema etep late, nema mette, sig eisauken Wou, ere God Eteri Wou, ere keremken tetan. ¹⁵Metye. Keremri tatame eme wule yaper mane nente. Tatame eme alwo pen sabe, sir petbe, wule tousibe, o kerebe tuma wobe. Etep tebe tatame eme mus eisau mette nenbe. Kem etepkap mus mane kir mette. ¹⁶Kem Kristen wule tobobe, eme kemne yaper nenen kem mus mette wote, kem sebera mane yate. Berai. Kem Krais eteri wakse, eke kem God erne pir won eri sig eisau wobetete.

¹⁷God ere tatame nogwape emne sin late nenbe. Eteri wakse ere emne kiyi sin late. Sene ere eri tuma yenbo naswoibe tatame emne beke nente? Ere emne yapersubuwai nente nenbe. ¹⁸God eteri tuma etep wobe.

Wule yenbo nenbe tatame eme yenbo agetage beke te.

Etep tebe, wule yaper nenen God erne magel taibe tatame eme
yenbo beke kip te.

¹⁹Etepkap, God ere kiyi mus mette wom Kristen tatame, kem wule
yenbo som tobobetete. Keremne seikim God eterne kem kenawaike som
abobetete. Ere kemne yenbo nente wom, ere etep tete nenbe.

**Kem Kristen lakerebe tame, kem Kristen
tatame emne noub lakerebetete.**

5 ¹Sene an keremri Kristen lakerebe tame emne tuma wuri wote.
Aren kir, an Kristen lakerebe tame. Nema yaku kere tamesip. Krais
ere mus metbetem, an etep ari lek lam. Krais eri mure eisau genik tete,
an etep kir lan mure kir peten metekwaste nenbe. Etepkap an kemne
yaku tuma wuri wote. ²An kemne wobe. Kem God eteri tatame emne
noub lakerebetete. Eme sipsipkap, God ere emne keremri letke rasen
lakerete wom. Tatame eme kemne mane egiyen kem yaku ek kerebetete.
Berai. Keremri porerek kem yaku metekwasen kerebetete. God ere etep
wobe. Kem tokwo pette mane abote. Kerem, kem yaku papke abon
muresen kerebetete. ³Kem keremri kulke tetan tatame emne mane
teitkwunen emne tuma mane nubke wote. Kem God eteri wule yenbowou
tobon emne wule yenbo kuyese peterate. Kem etepkap tete, eme kerem
nenbe wulekap kir noub etep tobote. ⁴Etep tete, Kristen Lakerebe
Apeilake Eisau ere genik tete yabelke kem som temente sig yenbo pette
nenbe.

Nema maime wusom God eteri letke raste.

⁵Kem tametobo yen, kem etepwou nente. Kem Kristen lakerebe tame
etemri kulke temente. Ye. Kem akei, kem maime teitkwunen awoawo
kobo labetete. God eteri tuma etep wobe.

Maime gabebe tatame God ere emne teitkwunbe.

Maime teitkwunbe tatame emne God ere pap yewon noub nenbe.
Etep wobe. ⁶Kem mureken God eteri kulke temente. Kem keremri sig
maime teitkwunte. Etep tete, God eter wote yabelke ere kemne sig eisau
wote nenbe. ⁷Ere kemne noub abobe, eke kemri akei abolawoibe wosken
nenlawoibe wosken kem eteri letke raste.

⁸Kem noub la. Kem eisa eisa. Kemri peiktame, Satan, ere mekinke
sewurbe. Boulri laion ere sewuren taye pitbekap, Satan ere etepke tebe,
ere tatame emne tan om ate sopen sewurbe. ⁹Kerem mus metbekap,
nogwape nowselri Kristen geisimase eme epkap epkap mus kir metbe.
Kem etep meten, eke kem God erne kenawaike abon noub teten Satan
erne wotakete. ¹⁰Kem mus meten kerake tete, pap kenake metbe God
eter, ere kemne eyaren nenewayen tetruwun mure sene newote nenbe.

Ye. Krais eterke God ere kemne wopeten kem eteri kom yenbok yin noub som temente nenbe. ¹¹Eteri mure eisau e som temente nenbe. E seken.

Tuma tep gwo.

¹²Sailas ere ane kobo lan an gwo tuma kerawai kemne bas rasbe. An wobe, ere tuma noub metbe mase. Kem pap yenbo tete, an etep abobe, eke an gwo tuma kemne bas rasbe. E God eteri pap yewobe tuma seken. Kem e tuma noubwai sebetete.

¹³Babilon komke tetan Kristen etemne kir, God ere emne wopetem, eme kemne pir wobe. Ari yen, Mak, eter kir, ere kemne pir wobe.

¹⁴Kristen pap yewobe wulek kem awoawo pir won tak awoawo kerete.

Kem Krais erken tetan tatame, kem pap yenbo temente.

Pita ere bas rasem tuma ab eteke.